



Mahasiswa UMP meriahkan Sambutan Tahun Baharu Cina

Lebih 1,000 pengunjung pelbagai kaum membanjiri UMP kampus Gambang bagi menyaksikan pesembahan kebudayaan sempena sambutan perayaan Tahun Baharu Cina pada 22 Mac 2014 yang lalu.

Program anjuran Jawatankuasa Kebudayaan Cina, Majlis Perwakilan Pelajar, Jabatan Hal Ehwal Pelajar & Alumni disambut meriah di Dataran Kolej Kediaman 3 ini mendapat kerjasama daripada pihak akhbar Sin Chew Daily.

Dekan Fakulti Kejuruteraan Awam & Sumber Alam (FKASA), Fadzil Mat Yahaya yang hadir mewakili pegawai universiti berkata, program ini merupakan salah satu inisiatif yang amat penting dalam memupuk perpaduan dalam kalangan mahasiswa yang berlainan warna kulit, budaya agama dan bahasa untuk hidup bermasyarakat.

"Program ini juga memberi peluang kepada mahasiswa untuk memahami dengan lebih jelas tentang budaya kaum Cina di samping mengekalkan keamanan dan kedamaian antara kaum di negara ini," katanya.

Tambah beliau, phak universiti sentiasa menggalakkan persatuan-persatuan pelajar agar bergiat aktif dalam menganjurkan program yang memberi impak kepada mahasiswa mahupun masyarakat luar.

Majlis ini turut dihadiri Ahli Parlimen Paya Besar, YB Dato' Abdul Manan Ismail, penasihat program, Dr. Liu Yao dan pengerusi program, Yan Shao Qin.

Sementara itu, Dato' Abdul Manan dalam ucapannya memuji inisiatif pelajar dalam penganjuran program sebegini yang bukan sahaja dapat menonjolkan bakat mahasiswa malah dapat menyatupadukan masyarakat

selaras dengan konsep 1Malaysia.

Beliau berharap dengan program sebegini secara tidak langsung dapat meningkatkan lagi hubungan silaturahim dalam kalangan mahasiswa dan masyarakat tanpa mengira kaum dan bangsa.

Pelbagai persembahan menarik berjaya menarik minat pengunjung antaranya Tarian Singa, Tarian Tradisional, Okestra Cina, Wushu, Diabolo dan tarian moden, 24 Season Drum dan Flag Waving.

Bagi pelajar antarabangsa UMP yang berasal dari India, Sugandha Chahal, 28 melahirkan rasa amat gembira apabila berpeluang untuk menghadiri program sebegini. Malah, beliau kagum melihat rakyat Malaysia yang berbilang bangsa dapat sama-sama hadir memeriahkan sambutan ini selain dapat menyaksikan sendiri persembahan dan warisan budaya masyarakat Tiong Hua di Malaysia.

